


TEZAUUR LITURGIC
10 IANUARIE

ACATISTUL
SF. IERARH-MUCENIC
ANATOLIE
GRISIUK,
MITROPOLITUL
ODESSEI
II



MOSCOVA, 2000



Акафист священномученику Анатолию, митрополиту Одесскому

Кондак 1

Избранного града Одессы небеснаго хранителя и Церкви Православныя великаго архипастыря Анатолия Священномученика днесь песньми почитаем. Ты же, отче священне, от всяких бед люди твоя сохрани, присно зовущия:

Радуйся Анатолие, священномучениче и исповедниче преславный.

Икос 1

Апостольских престолов сонаследниче и мученических ликов сопричастниче воистину явился еси, отче священномучениче Анатолие, сего ради песни похвальныя Господу возсылающе, дерзаем ти похвалу сицевую приносить:

Радуйся, столпе недвижимый благочестия,

Радуйся, всеславное посрамление злочестия,

Радуйся, архипастырю богоизбранный,

Радуйся, подвижниче всепрославленный,

Радуйся, Православия утверждение,
Радуйся, злобы адския обличение,
Радуйся, нечестие посрамивый,
Радуйся, венец мученический приемый,
Радуйся Анатолие, священномучениче и
исповедниче преславный.

Кондак 2

Видети возжелевши красоту в сынах
человеческих Краснейшаго, даже до Голгофы не
устрашился еси Ему последовати, непрестанно
взывающе: Аллилуиа.

Икос 2

Разума воистину небеснаго взыскующе,
пришел еси в дворы Господни, в Дом
Премудости Божественныя, да причастник Ея
воистину явишися нелестный и учениче
неленостный и последователю всеизряднейший,
сего ради вопием ти:

Радуйся, Премудрости Божественныя
возжелавый,

Радуйся, Разума Божественнаго взыскавый,

Радуйся, Путем Господним присно ходивый,

Радуйся, многих от путей погибельных
отвративый,
Радуйся, Христа учениче всеизрядный,
Радуйся, апостолов последователю усердный,
Радуйся, догматов твердый хранителю,
Радуйся, ересей и расколов обличителю,
Радуйся, Анатолие, священномучениче и
исповедниче преславный.

Кондак 3

Силою Божественною воистину облачен был
еси, отче Анатолие, якоже броней светозарною и
сего ради супротив стати возмогл еси кознем
диавольским, яко оружие всекрепкое песнь
победную имеюще: Аллилуиа.

Икос 3

Имуще разум, пламенем Божественным
облистаем, подвига иноческого всеусердно
возжелал еси, в ризу спасения облеклся еси и к
стаду спасаемому причтения сподобился еси,
сего ради похваляешься песнями
неумолкающими:

Радуйся, иноческаго жития ревнителю,

Радуйся, отцев древних подражателю,
Радуйся, суету вселукавую отринувый,
Радуйся, спасения всем сердцем возжелевый,
Радуйся, образе жития иноческого,
Радуйся, проповедание подвига
монашеского,
Радуйся, черноризцев похвало всерадостная,
Радуйся, православных песнь всеславная,
Радуйся Анатолие, священномучениче и
исповедниче преславный.

Кондак 4

Бурею всеяростною искушений и страстей
потшася враг вселукавый погубити тя,
избранниче Христов, ты же адамант твердый
веры Православныя показался еси и ко
спасению наставник явился еси всем, с тобою
песнь Богу приносящим: Аллилуиа.

Икос 4

Слышаще внуть сердца своего призыв
Господень, на подвиг исповедничества тя
призывающий, радостно Подвигоположнику

твоему последовал еси, тем же похвалами
величаешься сими:

Радуйся, звездо пресветлая неба церковнаго;

Радуйся, цвете всеславный вертограда
небеснаго;

Радуйся, грозде всесладкий Лозы
Благоплодная;

Радуйся, учениче Премудрости
Божественная;

Радуйся, добродельми светлоукрашенный;

Радуйся, венцем мученическим увязенный;

Радуйся, яко о тебе Церковь ликует;

Радуйся, яко пение тебе чада твоя приносят;

Радуйся, Анатолие, священномучениче и
исповедниче преславный.

Кондак 5

Богосвещенный имущи разум, Анатолие
отче преславный, не от людей премудрости
научен был еси, но от Ипостасныя Премудрости
– Сына Божия, Его же всем сердцем возлюбил и
служити всем житием восхотел еси и пение

умиленное принесл еси, непрестанно взывающе:
Аллилуиа.

Икос 5

Видя Сердцевидец Господь огонь любви
нелестныя, имже сердце твое разженно бысть,
на свещник кафедры архиерейския яко свещу
всесветлую воздвиже тя, сего ради, отче
веславне, похвалами ублажаеши сиецевыми:

Радуйся, архипастырю богопросвещенный,

Радуйся, святителю богоизбранный;

Радуйся, свеще, молитвой пламенеющая,

Радуйся, кадиланице, добродетельми
благоухающая,

Радуйся, похвало земли Одесския,

Радуйся, утверждение Церкви Русския,

Радуйся, огнем божественным
всеразженный,

Радуйся, светом Истины осиянный,

Радуйся, Анатолие, священномучениче и
исповедниче преславный.

Кондак 6

Проповедует Церковь Православная славу
твоего подвига и Подвигоположник Господь с
небесе тя венцем мученическим венчает и
ангели терпение твое славят и человецы песнь о
тебе Богу и Творцу приносят: Аллилуиа.

Икос 6

Воссиял еси яко столп огненный, в пустыне
всемрачной безбожия светлопламенеющий и
путь к Небесному Отечеству - Иерусалиму
горнему указующий, тем же, яко настанику
нашему, пение ти дерзаем приносить:

Радуйся, светом небесным нас освещающий,

Радуйся, огня геенского твоими молитвами
избавляющий

Радуйся, путь ко Христу показующий,

Радуйся, от пути нечестия отвращающий,

Радуйся, образе исповедничества
всетвердый,

Радуйся, Православия поборниче препетый,

Радуйся, зеркало благодати всесветлое,

Радуйся, похвало наша всерадостная,

Радуйся, Анатолие, священномучениче и исповедниче всеславный.

Кондак 7

Хотением возжелал еси Воскресшему Христу Господу послужити и, стопам его последствующе, возшел еси на брачный пир Агнца небеснаго и страннолюбия Владычня и бессмертныя трапезы на горнем месте Сиона причастился еси, веселым сердцем поюще: Аллилуиа.

Икос 7

Новый исповедник веры отеческия и священномученик преславный явился еси, отче наш Анатолие, не устранился еси повеления безбожнаго и не преклонил еси колена своя пред суетою мира и ныне к подвигу призываеши всех, поющих ти:

Радуйся, мечу, злочестие посекающий,

Радуйся, щите, верных защищающий,

Радуйся, подвигом своим ангелов удививый,

Радуйся, терпением своим бесовския дерзости посрамивый,

Радуйся, печи вавилонския не
устрашивыйся,

Радуйся, прещения мучителей не убоявыйся,

Радуйся, роса, еюже огонь безбожия
угасается,

Радуйся, море, имже зловерие потопляется,

Радуйся, Анатолие, священномучениче и
исповедниче преславный.

Кондак 8

Странно и недоуменно бысть ангельским
ликама житие твое равноангельное и чудно
бесплотным твое за Господа и Христа страдание,
темже терпение твое зряще, хвалу и славу в
подвиге твоем Укрепляющему воспевают,
взывающе: Аллилуиа.

Икос 8

Всем вся был еси, по слову апостола, отче
наш Анатолие, да некия Христу и Господу
приобрящеци. Тем же, житием твоим
наученнии и подвигом на путь спасения
наставлении и молитвою утвержденнии, чада
твоя духовная похвалы ти возсылают:

Радуйся, пастырю наш добрый,

Радуйся, отче милостивый и кроткий,

Радуйся, душу свою за стадо твое
положивый,

Радуйся, подвигом своим нас в Православии
укрепивый,

Радуйся, яко оружие Крест Христов
приемый,

Радуйся, тем всезлобную ярость победивый,

Радуйся, светом небесным души наша
озаряющий,

Радуйся, и ныне благословением твоим нас
осеняющий,

Радуйся, Анатолие, священномучениче и
исповедниче преславный.

Кондак 9

Всякия злочестивыя козни немощны
явищася, сего ради восплакаша демонския
полки, завистию растерзаеми, егда узреша тя,
отче наш Анатолие, на небеса восходящаго, и
Крест яко победы знамение носящаго, и песнь
всерадостную воспевающаго: Аллилуиа.

Икос 9

Витийствуете всеу, безбожия проповедники
вселестнейшие, - Церковь необорима адскими
враты красуется, Господа воспевающе и единого
от лика новомучеников песньми ублажающе
сицевыми:

Радуйся, Господа всем сердцем возлюбивый,

Радуйся, даже до смерти Ему последовавый,

Радуйся, Христу сораспявыйся всерадостно,

Радуйся, страдания приявый безропотно,

Радуйся, Крест Господень на рамена своя
приемый,

Радуйся, на Голгофу ликующе восшедый,

Радуйся, страданий Христовых Соучастник,

Радуйся, Воскресения Его сопричастник,

Радуйся, Анатолие, Священномучениче и
исповедниче всеславный.

Кондак 10

Спасе, спаси мя, яко Твой есмь аз, - тако в
молитве взывал еси отче, хлебом слезным душу
свою насышающе и в славословии утешение

обретающе посреде скорбей темничных, темже ныне в Невечернем дни Царствия Небесного со бесплотными песнь воспеваещи: Аллилуиа.

Икос 10

Стены темничныя и узы заключения не возмогоша крепости веры твоея сломити, ниже адовых врат служители от любви Распятаго Христа тя разлучити и к Небесному Престолу яко пламеновидный столп восходещи, ангелы окружаемый и человецы воспеваемый:

Радуйся, на небеса со славою восшедый;

Радуйся, венец мученический приемый;

Радуйся, муки и скорби ни во чтоже вменивый;

Радуйся, узами темничными узы злобы сокрушивый;

Радуйся, путь к небеси нам присно указующий;

Радуйся, благословением твоим нас ныне осеняющий;

Радуйся, молитвенниче о нас усердный;

Радуйся, ходатаю пред Господом
непрестанный;

Радуйся, Анатолие, священномучениче и
исповедниче всеславный;

Кондак 11

Пения наша похвальная и гласы молебныя
приими, отче наш Анатолие, и предстательством
твоим невредимы град и землю нашу сохрани, и
молитвами твоими и нас чада Света быти
сподоби, да с тобою песнь всерадостную поем:
Аллилуиа.

Икос 11

Светлостью подвига твоего, Анатолие отче
наш, Церковь Православная украшаемая,
веселится и радуется о Боже Спасе Своем и тя,
яко единого от чад Своих ублажающе, взывает:

Радуйся, Православия исповедниче,

Радуйся, твердости проповедниче,

Радуйся, Церкви Христовыя верный сыне,

Радуйся, Небеснаго Иерусалима славный
гражданине,

Радуйся, звездо пресветлая неба церковнаго,

Радуйся, крине благоуханный вертограда
Божия,

Радуйся, Царствия Христова наследниче,

Радуйся, вечныя Пасхи причастниче,

Радуйся, Анатолие, священномучениче и
исповедниче всеславный.

Кондак 12

Благодати Божия сосуде златокованный,
адаманте всекрепкий веры Христовыя, на
врагов оружие любви неборимое, Анатолие
священнострадальче, моление наше приими и
молитвою твоею на путь спасения настави, да
сподобимся во веки со ангелы воспевати:
Аллилуиа.

Икос 12

Поюще подвиг твой, величающе страдания
твоя и возвещающе яже ко Христу любви
крепость неодолимую, песни и пения духовная
от любви ти днесь сплетаем:

Радуйся, основание благочестия
непоколебимое;

Радуйся, утверждение Церкви неборимое;

Радуйся, стено, верных ограждающая;
Радуйся, звездо, путь ко Христу показующая;
Радуйся, сосуде, благодатию преисполненный;
Радуйся, ковчеже, дарами духа
всеукрашенный;
Радуйся, чудес источниче неистощимый;
Радуйся, исцелений кладезе неисчерпаемый,
Радуйся, Анатолие, священномучениче и
исповедниче всеславный.

Кондак 13

О, преславный и всепетый отче наш
Анатолие священнострадальче, немощных устен
пение недостойное днесь от любви ти
приносимое прими и от всякаго зла ны
неврежденны сохрани, да молитвою твоею
присно укрепляемые, в Царствии Христовом с
тобою и всеми святыми пети сподобимся:
Аллилуиа.

Сей кондак глаголи трижды, а посем 1 икос
и 1 кондак.



ПОЛНЫЙ
АКАФИСТНИК
КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

I

НУЖЕ
* НЕ БО